



## Program d'emprender TRIAS

(Training per praschunieras e per praschuniers sco er per personas ch'èn sortidas da stabiliments da retenziun)

### Principis/finamira

Ils programs d'emprender TRIAS èn ina purschida dal servetsch per l'assistenza da rehabilitaziun da Turitg e dal stabiliment per l'execuziun giudiziala Realta. La finamira da quests trainings è quella da sustegnair las participantas ed ils participants cun bunas abilitads socialas per dumagnar cun success las sfidas e las difficultads ch'ellas scuntrar en il mintgadi. Sch'i dat interessentas ed interessents avunda, vegnan quests trainings organisads quatter giadas per onn.

Ils programs d'emprender èn structurads en las suandantas **duas fasas**.

### Fasa 1 – Training per schliar problems durant l'execuziun dal chasti

Gruppa en mira: La fasa I sa drizza a praschunieras ed a praschuniers che han problems da dumagnar problems e conflicts en ina moda e maniera constructiva.  
Cuntegn: A las participantas ed als participants vegnan mussads models simpels per estructurar problems e conflicts e per als prender per maun pass per pass.  
Lieu d'occurrentza: stabiliment per l'execuziun giudiziala Realta  
Realisaziun: 6 sesidas en gruppa a 3 ½ uras (per emna)

- Sch'ina participanta u sch'in participant vegn nunperstgisadamain memia tard al training datti in'admoniziun. En cas da repetiziun u en cas d'ina mancanza nunperstgisada dal training vegn il congedi reduci per 12 uras e sche la participanta u sch'il participant n'ha nagin dretg pli da congedi, vegn ella u el serrà en en la cella per 2 dis.
- Sch'il training vegn sisti pervia d'atgna culpa, vegn il congedi reduci per 24 uras.

### Fasa 2 – Training per ina candidatura e training da comunicaziun

Gruppa en mira: La fasa II sa drizza a praschunieras ed a praschuniers che sortan proximamain dal stabiliment resp. che midan ad ina lavur en l'externat e che vulan emprender co ch'ins maina in discurs da candidatura e co ch'ins communitgescha.  
Cuntegn: A las participantas ed als participants vegni mussà co ch'ellas ed els pon dumagnar cun success situaziuns da discurs criticas. Prendida en mira vegn ina moda da communitgar ch'è conscianta e natirala e che resguarda la persuna visavi.  
Lieu d'occurrentza: servetsch per l'assistenza da rehabilitaziun Turitg II, Turitg  
Realisaziun: 6 sesidas en gruppa a 3 uras (per emna)

- Per pudair sa participar a la segunda fasa dal training sto esser avant maun ina permissiun da congedi.

- Ils custs dal training (viadis cun la viafier e cun il tram, daners da giaglioffa) surpiglia il SEG Realta ed il servetsch per l'assistenza da rehabilitaziun Turitg. In'atgna participaziun da las participantas e dals participants da 50.– francs per la durada da l'entir curs vegn deducida dal conto bloccà.
- En cas d'ina sistida dal TRIAS or d'atgna culpa vegn messa a quint retroactivamain ina contribuziun als custs da 20.– francs per mintga unitad da curs ch'è vegnida frequentada. Quest import vegn deducì dal conto liber e vegn bunifitgà al fond da las praschunieras e dals praschuniers dal stabiliment.
- Sch'ina partecipanta u sch'in participant vegn nunperstgisadamain memia tard al training, vegn il congedi reducì per 12 uras. En cas d'ina mancanza nunperstgisada dal training vegn stritgà in congedi da relaziun.
- Uschiglio valan las regulaziuns davart congedis tenor il catalog da sancziuns dal stabiliment
- Las absenzas per la participaziun a quests trainings valan sco congedis specifics. Il referendari ch'è cumpetent per ils congedis regla ils detagls.

### **Occurrenza d'infurmaziun**

Per regla fa il servetsch social Realta quatter giadas per onn in'occurrenza d'infurmaziun davart quests trainings. A nus statti a cor che las praschunieras e ch'ils praschuniers hajan enconuschentschas detagliadas da talas purschidas. Pervia da quai ston tut las personas envidadas sa participar obligatoricamain a questa occurrenza. Ella vegn messa a quint sco temp da lavur pajà. Sch'intgin na vegn betg a questa occurrenza, vegn ses congedi reducì per 24 uras.

### **Participaziun e cundiziuns**

- Ina participaziun a quests trainings è da princip voluntara. Sch'ina persona s'annunzia, s'oblighescha ella però da sa participar a tut il curs.
- Sch'ina persona frequenta il training senza absenzas, ha ella il dretg da survegnir il peculium cumplain.
- Per pudair sa participar a quests trainings sto vegnir absolvida cun success in'examinaziun da la qualificaziun e la persona interessada sto savair bain tudestg.
- In dretg legitim da pudair sa participar a quests trainings na datti betg. La planisaziun da l'execuziun dal stabiliment po revocar da tut temp il dretg da participaziun, sch'i dat problems cun la praschuniera u cun il praschunier.

Infurmaziuns pli detagliadas dat il servetsch social. La lavurera sociala cumpetenta u il lavurer social cumpetent è responsabel per la planisaziun, e quai en collavuraziun cun il servetsch per l'assistenza da rehabilitaziun Turitg. Sin dumonda dal servetsch social decida la planisaziun da l'execuziun dal stabiliment davart la participaziun.

Questas directivas èn en vigur dapi ils 14 da november 2001 (conclus davart la planisaziun da l'execuziun dals 14 da november 2001).